



# Fung Saenq Cang Miz Saenq-fung Caeuq Youzbyau Haenx

## 一封装有信封与邮票的信

上林县大丰镇皇周小学四年级一班 黄文荣

Geizgonq yozyau cujcz hozdung, yauhgiuz raeuz sij fung saenq、gien bonj saw ndeu hawj siuyoz lajmbanj. Gyoengq doengzhag cungj cizgiz yangjying, dawz 《Govai Yezduz》《Gohou Lensiz》daengj haujlai saw gien okdaej, banhcujiyin hawj moix boux doengzhag fat cieng ceijdiuz ndeu, gwnzde miz lienzheih dicij, gou aeu sij saenq hawj Vangz Bingzbingz doengzhag.

Sij ndaej saenq nem youzbyau geiq okbae le, gyoengq doengzhag cungj muengh sou ndaej hoiz saenq. Miz ngoenz ndeu banhcujiyin gaem dab saenq ndeu byaij haeuj gyausiz, gyoengq doengzhag cungj angq dwk doeg gij hoizsaenq ciheij. Gou gaem fungh hoiz saenq gou, fatyienh gwnzde mbouj nem youzbiu, cij youq gwnz saenqfung yaenq aen yaenq.

Cuengqhag ma ranz, gou cam daxboh: “Neix dwg vih gijmaz?” Daxboh lwnh gou: “Gojnaengz dwg yozyau baihaenx dungjyiz geiq saenq okdaej, yozyau fucwz ok cienz.”

Gou naeuz: “Danghnaeuz yozyau

mbouj caiq dungjyiz cujcz lo, dwg mbouj dwg doengzhag ciheij couh gag ok cienz cawx saenqfung caeuq youzbyau lo?” Daxboh naeuz: “Dwg ha, mboujmiz youzbyau, saenq baenz-lawz geiq okbae ne?”

Ndaw sim gou gag ngeix: “Lauxsae naeuz hagdangz lajmbanj miz mbangj lwgnyez ndaw ranz gig gunnanz, lienz ra geij maenz ngaenz cawx saw cungj mboujmiz, seizneix geiq saenq aeu 2 maenz ngaenz, danghnaeuz aeu sij saenq lienzheih, yienghneix va cienz hix lai ha, baenzlawz banh ne……”

Hoiz saenq seiz, gou cawx aen

saenqfung hung ndeu, youh lai cawx 10 cieng youzbiu caeuq saenqfung, cienzbouh cuengq youq ndawde, nem youzbyau le couh geiq okbae lo.

Bohmeh rox le angq dwk byaujyangz gou. Gvaq geij ngoenz le, banhcujiyin gaem aen saenqfung byaij haeuj gyausiz naeuz: “Vangz Vwnz-yungz, neix dwg saenq mwngz.”

Yawj gij saenqfung baihgvaiz miz gij mingzcoh “Vangz Bingzbingz”, yawj gij youzbyau caeuq saenqfung gig sug haenx, gou lij caengz hainduj doeg saenq ndaw sim gaenq lumj oij yub dangz nei diemzsi bae.

(指导老师:潘月梅)

# Gij Haemzhoj Gofaexhung

## 大树的苦衷

武鸣县仙湖镇中桥小学 六(3)班 覃姿铭

Gou dwg go faexhung ndeu, gaej yawj gou ndang cock, vifung vutvut, hoeng youq dangqnaj vunz lajmbwn, gou cix gamjdaengz fouznaih.

Gou seiz lij iq, caen mbouj yungzheih. Lij geiq ndaej gou ndaej song bi seizhaenx cingq dwg seizcin, gou daegbied mbouj yungzheih maj ok geij mbaw, did ok geij nyez, hoeng miz ngoenz ndeu, geij daeg lwgnyez manzgyaengq dawz gou gaemh roengzdaej, euj seuqsat. Gij in haenx, daengz seizneix gou cungj mbouj lumz.

Cibhaj bi bi haenx seiz-hah, gou cingq dwg lwgnyez cauq, ndang gou gaenq hung lumj aen doengjraemx lo. Gou miz aen mauh gig hung-loet, doengx-ngoenz, gou cw raemh cau hawj yungz; doengxhaemh, gou aemq ndaundeiq daiq ronghndwen, vih vunz lajmbwn hen ranz hen dieg. Gij nye gou, gij mbaw gou, cungh dwg vih vunz lajmbwn guh gungyen. Seiz vunz lai mo gou, gou gamjdaengz cibfaen angq caeuq vuenyungz. Hoeng vunz lajmbwn mbouj gingq gou, gyoengqde ciengzseiz yungh dietcanj dub gou, dawz vaiz dawz yiengz lamh youq gwnz dang gou, vaiz goed yiengz henx gyoengqde cungj mbouj guenj, lij ciengzseiz youq henx ndang gou

lwnhnaeuz yaek raemj gou. Gou ciengzseiz lau dwk gaemzheiq hung cungj mbouj gamj diem. Gou cienz ndang cungj dwg sieng, dauqcawq cungj dwg lwed, gwnzndang ca mbouj geijlai byoengq cien congh fanh congh lo, hoeng coengzlaiz mbouj gamj ienq vunz lajmbwn, gou maqmuengh gyoengqde ndaej hojlienx gou, hawj gou ndaej an' onj di, hawj gou ndaej lai lix geij ngoenz.

Gou ciengzseiz yawjraen gij beixnuengx gou ngaiz vunz lajmbwn yungh cax fouj bag raemj dwk sigsanq, mizmbangj aen ndang lij ngaiz faeg soi q bae, caen hawj gou lau raixcaix. Gou moix ngoenz cungj gvaq ndaej youh in youh dungxcieg. Gou mbouj sai mbouj mbwk, vunzgyonz gag youq, yienz-naeuz gou ndaej samcib lai bi lo, lij dwg hauxseng cauq. Gou ndaej dangj rumz dangj fwn, ndaej re raemx namh louzsaet. Gou caeuq gyoengq doengzdoih gou doengzcaez ndaej hoenx-hingz doemboenq, caeuq nywjiq itheij sawj diegsa bienqbaenz saekloeg, caemh-caiq ndaej hoenxhingz rumzgeujgaeq. Gou caen mbouj mingzbej, vunz lajmbwn vih gijmaz buqvaih raeuz? Aeu rox, buqvaih raeuz hix dwg buqvaih vunz lajmbwn shwgeij ha!

Gou gig fouznaih ha!

(指导老师:潘彩波)



# Gienh Saeh Nanzlumz Ndeu

## 难忘的一件事

Dwzbauj Yen Lungzsangh Cunghsinh-yau seiq nienzgaep Vangz Binhbinh

Seiz lwgnyez gou miz gienh saeh iq ndeu hawj gou gig nanz-lumz.

Sam bi gaxgonq haet ndeu, gou aemq daehsaw daej daengz hagdangz. Ngamq byaij haeuj gyausiz, boux doengzhag genjcaz cozyez haenx byaij gvaqdaej coh gou. “Aiya, mbouj ndei! yijvwnz cozyez gou lij caengz guh liux.” Shwgeij dwg boux banh ganbu, mbouj guhsat cozyez, neix baenzlawz banh…… Yaephe, gou daengx ndang conh hanhnit. Seizneix, boux doengzhag genjcaz cozyez couh heuh gou dawz yijvwnz cozyez okdaej hawj de genjcaz yawj. Gou gazngwdngwd dwk naeuz: “Lumz……lumz cuengq youq ndaw ranz lo.” Boux doengzhag haenx mbouj caiq cam roengzbae.

Hwnjdangz lo, ndaw sim gou couh lumj cibhaj aen diuj doengj caet hwnj bet roengz, lienz lauxsae gangj gijmaz hix mbouj rox.

Roengzdangz lo, mbouj rox vih gijmaz, Luz lauxsae heuh gou bae bangunhsiz. Gou bienq ndaej engqgya vueng lo. Luz lauxsae cam gou: “Gou yawjraen mwngz naengh mbouj onj, miz gijmaz saeh lwi?” Lauxsae lumj yawj ok gou vih gijmaz vueng lo. Gou mboujmiz banhfae couh dawz saedsaeh gangj okdaej, doeklaeng, Luz lauxsae hozunq dwk naeuz, vunz bengz youq lauxsaed, lij gangj Lezningz dwk vaih aen vabingz cujdung nyinh loek aen goj neix hawj gou. Dingq gij vah lauxsae, ndaw sim gou couh lumj miz aen bingz he dwkboeg doxgaiq, soemj、diemz、haemz、van、manh gij feih neix caenx haeuj ndaw sim daej. Raemxda youq gvaengzda ringx geij baez le, swnh gemj lae roengzdaej.

Gienh saeh neix yienznaeuz gvaqbae sam bi lo, hoeng gij vah lauxsae seizseiz gaek youq ndawsim gou, daezsing gou guh ndei moix gienh saeh.

(cijdauj lauxsae: Lingz Binjcoz)

